

欽
定
全
唐
文

欽定全唐文卷八十目錄

宣宗二

授蕭鄴平章事制

授昭王訥成德軍節度使制

授鄭朗太子少師制

授崔慎由監修國史蕭鄴集賢殿學士制

贈鄭朗司空制

授劉瑑平章事制

授崔慎由劔南東川節度使制

授蕭鄴監修國史劉瑑集賢殿大學士制

授夏侯孜平章事制

罷蔣伸判戶部制

授夏侯孜集賢殿大學士制

答百僚請加尊號第三表詔

以杜黃裳裴度配享憲宗廟廷詔

令議武臣配享憲宗廟廷詔

焚埋匿名文狀詔

勅州縣條奏利弊詔

兩稅外不許更徵詔

飭獄吏推斷不平詔

令詳定盜賊贓罪詔

諭州縣上佐丞簿詔

萬壽公主出降詔

禁奸吏舞文詔

委京兆府捉獲奸人詔

以夏令䟽理滯獄詔

答兩省諫幸華清宮詔

議立回鶻可汗詔

遣使冊回鶻可汗詔

答諫迎道士軒轅集詔

答河東軍民乞留節度使崔彥昭詔

遺詔

欽定全唐文卷八十

宣宗二

授蕭鄴平章事制

輔相之任也調陰陽而撫夷夏貞百度而康兆人代天爲
工持國之柄殷夢周卜竭誠待賢彼何人哉予獨不可寘
于精懇果得髦傑朝散大夫守尚書兵部侍郎判度支上
柱國彭城縣開國男食邑三百戶賜紫金魚袋蕭鄴天實
佑朕生此令人星辰降祥珪玉含瑞蘊通明經遠之識抱
宰制利用之才載居禁垣重參宥密資委旣至忠謹愈聞

爰付地征仍司邦計善爲均節益茂事功道惟剛明人無
侵撓風望彌峻遐邇具瞻思致昌期必資俊德是以簡自
朕心叶於僉諧擢登中樞持平庶政爾其體太和而順元
氣推至心以序彝倫短長之才罔有所廢細大之務一以
居心扶皇極而作國楨庇蒼生而遂物性雖堯舜比聖朕
何敢言而夔龍致君爾無多讓周以冢宰致國用漢任丞
相調兵食斯舊典也母謂其煩懋建嘉庸對此崇寵可守
本官同中書門下平章事仍判度支

授昭王訥成德軍節度使制

門下近制諸侯薨歿朝廷或命其子弟嗣守爵者且慮職卑望輕未能彈壓軍行乃詔親王爲帥以統臨焉蓋尚體行權之旨也昭王訥貞祥所聚姿質幼茂孝敬天授溫文日宣寧勞保傳之規自識君親之道學禮不倦發言有章式光維城宜假分閫朕以趙地名服常山奧區人多忠樸俗尚義勇少長有禮里閭自康屬帥臣云亡戎府無長中權劇務已委諸甥上將崇名允歸愛子顧梁園以雄處秉漢節以遙臨光撫舊封式膺新命歡不阻於膝下詔榮宣於廷中邦家有光藩屏斯盛九命俾尊於開府一方遠奉

於建牙實惟至公勉服丕訓可開府儀同三司守鎮州大都督充成德軍節度鎮冀深趙等州觀察處置等使封如故主者施行

授鄭朗太子少師制

相輔之臣賢傑是膺苟或道茂台階功宣時柄洪化方深於倚注微疴遽告其退休宜降寵私俾安頤攝庶得君臣之義實全終始之恩通議大夫守中書侍郎兼禮部尚書同中書門下平章事監修國史上柱國賜紫金魚袋鄭朗靈鳳耀儀非熊表德貞厚可以鎮風俗謙恭可以和神人

量合澄波氣凝金璞論議必根於王化文章雅叶於國經
起於卑寮積乃重望自周旋臺閣總領藩方故事盡著於
典章仁聲藹流於謠詠頃司邦計國用以殷逮領憲闡朝
綱載肅洎乎克符夢卜遂委鈞衡理庶政而百度惟貞調
元氣而三光增耀而久勤獻納稍失節宣屢陳謝病之辭
特舉優賢之命是用釋茲機務允乃至誠爾其專一精神
輔助藥石將圖有閒務在無營往參六傳之榮仍加貳令
之職用爲羽翼爰輟股肱嘉猷永播於事功深睠豈忘於
興寢慎爾多福祗承恩寵可檢校尚書右僕射兼太子少

師

授崔慎由監修國史蕭鄴集賢殿學士制

門下惟政之艱非賢勿用熙庶績實仗羣材頃所以肝
食宵衣勤求機衡之寄咸得時哲副予虛懷太中大夫守
工部尚書同中書門下平章事集賢殿大學士上柱國賜
紫金魚袋崔慎由器識淹通風鑑明秀黃香之祇勤彌切
壺遂之深衷足稱朝散大夫守尚書兵部侍郎同中書門
下平章事判度支上柱國彭城縣開國男食邑三百戶賜
紫金魚袋蕭鄴操履清方詞調凝遠孔光之慎密早著山

甫之將明可嘉而並宏覽典墳博通理道亟更顯重雅有
風教允副僉諧當茲鈞軸延謀時務稽參政途盡心力以
經邦宏禮樂而緯俗羣善必舉庶官乃和可以勒美太常
書忠甲令者矣今則三秋式稔四境無虞乃眷股肱厥有
成績至於總史官之微婉備帷幄之講求繼美臯夔比良
遷董顧茲茂典式示褒優敬爾在公服我休命慎由可監
修國史鄴可充集賢殿學士餘如故主者施行

贈鄭朗司空制

故通議大夫檢校尚書右僕射兼太子少師上柱國賜紫

金魚袋鄭朗植操端方稟氣莊重藹若瑞玉澹如澄川智
略合乎著龜誠信服於僚友自膺寵寄頗負全才竭匪躬
於諫垣彰盡瘁於瑣闥載踐方嶽亟登師壇觀風推惠愛
之心訓士得撫循之術政溢聞聽念茲徵還位冠冬卿職
重邦計經費有節財用不虧繫彼休功明我推擇爰嘉峭
峻俾總紀綱公望益隆典彝具舉式諧注意且沃深衷俄
煦和風遠浹膏雨方俟坐鎮雅俗表率庶官頤養或乖膝
理生疾屢陳章疏乞遂退閒既堅乃誠式允其請每圖懿

績唯冀有瘳何竟至於彌留而遽聞於捐代閱奏興悼臨
軒載懷將輟視朝之儀兼列上公之秩慰茲幽壤期爾有
知可贈司空

授劉瑑平章事制

闡大化以建皇極敷至德以乂黔首百度惟允八荒用寧
倚於輔臣副以邦柄求之夢獵協於著龜克諧明謨允屬
僉議稽能必思於廟略疇德佇煥其國經朝議大夫守尚
書戶部侍郎判度支上柱國賜紫金魚袋劉瑑岳彩舒輝
鸞姿降靈馭煙霄而六轡齊升布雲和而九成合奏行居

人表文著國華潤色詞林早參宥密彩筆旣符於宿夢温
樹不漏於私言再秉絲綸貳於刑讞振藻益茂聽詞無冤
洎尹正洛師擁旄梁苑咸能變風俗而求人瘼和號令以
肅軍威重委北門輯茲王業旣聞報政果叶予懷是用付
以煩難慎司邦計彌月探執繫時功成已洽咎夔之風宜
膺台鼎之命爾其平章百姓敬敷五教使羣職必舉四夷
率賓杜回邪之迹開讜正之門大道必寘其沃心忠信無
懼於逆耳於戲大小之政旣已咨之成務且輟於司存均
節尚煩於廟算祇我明訓服茲休嘉可守本官同中書門

下平章事依前判度支

授崔慎由劔南東川節度使制

夫尊任輔相之道也入則秉鈞衡以臨羣辟出則賜弓矢以長諸侯寵光不渝寄屬咸重將求良翰乃命台臣太中大夫守中書侍郎兼禮部尚書同中書門下平章事監修國史上柱國賜紫金魚袋崔慎由繼美德門承家貴位縉紳偉望禮樂上流挺松筠之貞姿服蘭蓀之懿行自居多器累厯清華禁林才擅於多能綸閣詞推於巨麗物情愈茂廷譽甚高再列貳卿之崇亟闡六條之化爰加獎任益

委重難屢啟嘉謀俄參大柄而周涉寒暑備見器能道已著於始終恩豈殊於中外睠茲東蜀實曰奧區俾授旌旄以彰優重昔叔子望高於峴首次公聲振於潁川孰有後先率是爲理勉宏風教期懋厥庸可檢校禮部尚書使持節梓州諸軍事兼梓州刺史御史大夫充劔南東川節度副大使知節度事管内觀察處置等使

授蕭鄴監修國史劉瑑集賢殿大學士制

門下康濟生靈必在陶甄之化稽參政事允歸王佐之才況乎元首股肱義均一體叶心同德予懷所嘉式兼刊綜

之榮用舉褒隆之典朝散大夫守工部尚書同中書門下
平章事充集賢殿大學士上柱國彭城縣開國男食邑三
百戶賜紫金魚袋蕭鄴襟神清肅器鑒精通敷贊大猷孫
宏有慎厚之行朝議大夫尚書戶部侍郎同中書門下平
章事判度支上柱國賜紫金魚袋劉瑑業履清方風標峻
整彌綸庶務安國乃任職之臣而皆詞煥丹青道潤金璧
匡衡貢禹經術該明孔光師丹議論寬博或頃司邦計茂
底慎之規或嘗擁節旄著繕完之績洎膺樞近益暢謀猷
每見沃心實諧注意俾厥后爲堯舜納百姓於休和即竭

乃誠期於予理子長子駿之職石渠天祿之書稽合異同
裁成褒貶儒雅之任迭選攸宜式表茂勲用榮兼領永綏
寵渥往乎於休鄴可監修國史璩可兼充集賢殿大學士
餘各如故主者施行

授夏侯孜平章事制

自古有天下得列聖帝哲王之科者必由良臣以就景化
故君非輔弼無以啟昌期時未清平不得稱賢相契合交
感相須而成苟非其人豈副斯舉朝議大夫尚書兵部侍
郎充諸道鹽鐵轉運等使上柱國賜紫金魚袋夏侯孜禮

樂重德簪裾上流才可兼人智可周物蘊範時之行義富
經國之文章識探奧微器抱沖粹早踐清列克彰令名關
當七月匡諫無隱再歷三獨糾繩不回廉風俗而政清提
紀綱而望振旋領版籍亦司牢盆推公秉持息力完緝法
得其倫要吏憚其威稜國財可豐官事具舉是用陟此邦
傑付之廟謨既諧朕心且洽僉論於戲宰輔巨任羣倫共
瞻政乖其宜則四海罹弊事叶其理則萬人以蘇副吾拔
擢之恩勵爾夔諧之道朝廷聳望爾其戒之可守本官同
中書門下平章事依前充諸道鹽鐵轉運等使

罷蔣伸判戶部制

門下輔弼之任陶鈞爲重所以導陰陽而施化相天地以
成功宣亮皇猷藻飾王度苟或嬰以他務兼拘利權則異
乎代天佐理之道矣通議大夫尚書兵部侍郎同中書門
下平章事判戶部事護軍賜紫金魚袋蔣伸紫微上才清
廟雅品潔如寒玉峻若孤峯旣高絕俗之姿能履中和之
道秉吉士之操時然後言學君子之儒仁而且勇洎寵承
內旨擢處禁垣嘉言屢沃於朕心密贊深知其忠懇委司
版籍益彰器能遂踐台階頗洽公望澄源以正本循名而

責實豈以司存尚煩丞相去茲劇務俾專緝熙所宜竭爾
一心開予四目推至公而平庶政也依前兵部侍郎同中
書門下平章事散官勲如故

授夏侯孜集賢殿大學士制

門下朕居兆人之上當萬機之廣戎夷式敘陰陽克調實
宗社降靈輔弼宣力臻彼富庶至於洽平旣彰大明益佇
化成之妙載煩台席用盛儒林之選朝議大夫守尚書兵
部侍郎同中書門下平章事充諸道鹽鐵轉運等使上柱
國賜紫金魚袋夏侯孜材協國楨道稱王佐以孝友爲家

行以禮樂爲身文潢陂納寬澗松挺節雄詞擅雅奧學洞
微利刃發硎而肯綮無滯代天宰物而挺埴有餘薰然至
和霈若潛潤況精列圖籍煥開禁垣高列雋髦翔集近署
雅歸清重方在專總演暢事功顯揚懿美是宜更一乃志
愈專乃衷吐辭雖酌於當今正學必思於稽古俾密勿之
際啟沃之間無忘我以三墳五典更光丕績永孚於休可
充集賢殿大學士餘並如故主者施行

答百僚請加尊號第三表詔

朕獲承丕緒奄有萬方憂物之心常懷惕厲荷天之力漸

至底寧此中外元僚文武庶政咸有一德以匡沖人而卿等猥以鴻名加於菲薄拜章瀝懇至於再三伏念自列聖以來何嘗無今日之請然率不能讓者上慰宗廟之靈下迫羣臣之願粵予小子豈敢久勞卿士之心哉敬允乃誠良深自愧所乞宜依

以杜黃裳裴度配享憲宗廟廷詔

朕以憲宗皇帝道叶中興威加寰海開啟聖意則有杜黃裳弼成功業則有裴度著在國史時無比倫宜以杜黃裳裴度同配享禮

令議武臣配享憲宗廟廷詔

論功配食文武宜兼元和一朝武臣功力最高者定一人與杜黃裳裴度同配享憲宗皇帝室頃李愬有平蔡之績高崇文有收蜀之功校其二人功孰爲重宜令尚書省議奏

焚埋匿名文狀詔

比來多有無良之徒妄於街衢投置無名文狀及箭上并旗幡上肆爲奸言欲以惑聽自今已後如有此色宜準寶應二年正月十八日勅令所在地界於當處焚毀埋藏不

要聞奏

勅州縣條奏利弊詔

應天下州縣或土風各異或物產不同或制置乖宜或章條舛謬或云施之歲久或緣礙於勅文有利於人而可舉行者有害於物而可革去者並委所在縣令錄事參軍備論列於刺史具以上聞委中書門下據事件下觀察使詳言列奏當與改更各從便安自當蘇息如或在官因循不舉後來者無以申明利害較然違慢可見當重加懲罰仍更不得授縣令錄事參軍刺史委中書門下具名奏聞別

議殿責

兩稅外不許更徵詔

食力之徒須令自濟天下倉場所納斛斗如聞廣索耗物
別置一倉斛斗又隨斗納耗物率以爲常致疲人轉困職
此之由自今委長吏切加提舉一切依倉部格如有違犯
專知官停見任仍殿兩選所由決脊杖二十準法處分所
貴利歸農畝耕者不饑其天下諸州府百姓兩稅之外輒
不許更有差率已頻申飭尚恐因循宜委御史臺切加糾
察如有違犯縣令錄事參軍判官節級科責長吏不存勾

當亦委臺司察訪聞奏其諸道州府應所征兩稅區段等物並留州留使錢物納區段等虛實估價及見錢從來皆有定額如聞近日或有於虛估區段數內實徵估物及其分數亦不盡依勅條宜委長吏切加遵守苟有違越必議科繩本判及專知官當重懲責又青苗兩稅本繫田土地既屬人稅合隨去從前赦令累有申明豪富之家尚不恭守以後州縣覺察如有此比須議痛懲地勒還主不理價直

飭獄吏推斷不平詔

刑獄之內吏得使情推斷不平因成冤濫無問有賊無賊並不在原免之限

令詳定盜賊贓罪詔

攘竊之興起於不足近日刑罰頗峻盜賊益煩贓至一千便處極法輕人性命重彼貨財既多殺傷且乖教化況非舊制須議改更其會昌元年二月二十六日勅宜委所司重詳定條流聞奏

諭州縣上佐丞簿詔

每思前賢設官分職豈徒然哉今州有上佐縣有丞簿俗

謂閒官不領公事殊乖制作之本意也自今後州縣公事上佐丞簿得失須共參詳如有敗闕或不遵法理及百姓流亡不先舉明並須連坐冀得人展其才官無冗食

萬壽公主出降詔

女人之德雅合慎修嚴奉舅姑夙夜勤事此婦之節也先王制禮貴賤同遵既以下嫁臣寮儀則須依古典萬壽公主婦禮宜依士庶

禁奸吏舞文詔

法司使法或持巧詐分律兩端遂成其罪既奸吏得計則

黎庶何安自今已後應書罪定刑宜令直指其事不得舞
文妄有援引頒示天下長吏嚴加覺察不得輒使奸吏如
有此色當議停解

委京兆府捉獲奸人詔

如聞近日多有閒人不務家業嘗懷凶惡肆意行非專於
坊市之間恐脅取人財物又其中亦有曾爲趨吏依倚門
欄自恐愆尤遂致停解不思已過卻務怨讎妄構虛辭恣
行恐嚇要懲此弊以靜奸源自今已後宜委京兆府切加
訪察如有此色便捉獲痛加刑斷

以夏令䟽理滯獄詔

此後除巨蠹所不原外每立夏至立秋前犯罪人就州府常條之中量與減貸速爲䟽理無令淹繫

答兩省諫幸華清宮詔

朕以驪山近宮真聖廟貌未嘗修謁自謂闕然今屬陽和氣清中外事簡聽政之暇或議一行蓋崇禮敬之心非以盤遊爲事雖申勅命兼慮勞人卿等職備禁闈志勤奉上援經據古列狀獻章載陳懇到之辭深睹盡忠之節已允來請所奏咸知

議立回鶻可汗詔

朕聞王者立德必本於念功天下歸仁莫先於興滅回鶻
久爲與國常建大勲累申式配之儀兼展稱藩之禮天寶
末興兵之後國步未夷釁起凶妖率其忠勇控弦而至革
車之會增威止戈而歸犀毗之賜甚寵殊庸盛禮煥烈縑
紉是爲親隣成其邊衛牧馬遠迹於朔野烽火罷照於甘
泉雖云華夷歡若親戚會昌中遠方喪亂可汗淪亡狼顧
旣困於歲牧鼠竊或行於邊候時屬姦臣作軸懦將操戈
因樂禍以乘危遂興戎而生事不念救災之義盡爲助順

之功驅彼流離窘爲徒隸情關懷土自比南冠之悲跡則
亂華未免北風之思舊國空瞻其茂草名王猶困於旅人
相彼窮危寧無慨歎朕君臨九有子育兆人雨露之所霑
濡日月之所照燭欲令自遂必念好還乃眷朔易之雄況
當勲力之後每思報德實用疚懷所以頻遣詔書俾勤尋
訪穹廬莫覩甌脫已平萬騎豈無其忠臣六角冀存其貴
種頗勞寤寐屢閱歲時沙漠旣空井邑猶在近有回鶻來
款朔方帥臣得之送至闕下又有回鶻隨黠戛斯李兼至
朝廷各令象胥徵其要領音塵可訪詞旨必同願復本邦

仍懷化育皆云寵特勒今爲可汗尚寓安西衆所悅附賜
宰相以忠事上誓復龍庭雜虜等以義向風頗聞麇至關
契素願慰悅良多俟其歸還衙帳當議特舉冊命今遣使
臣且往慰諭況情深振撫道旣切於懷來而功濟艱難義
豈忘於繼絕至如待呼韓以殊禮約冒頓以和親止於嘉
其來朝亦或慮其爲患今則因此離散追彼功勲俾立國
於狼居稍聚人於烏合再尋舊好宜舉良圖報告天下咸
知朕意

遣使冊回鶻可汗詔

夫興滅繼絕有國之懿圖推亡固存先王之茂典在春秋
時齊秦列國之諸侯也秦穆尚存於晉嗣齊桓猶繼於莒
土況我國家超邁皇王并包宇宙昔者回鶻可汗在武德
之初始畢效力於太宗在天寶時葉護有功於京洛乾元
至德之際與子儀叶心大破西虜自時以降誼爲舅甥歲
有通和情無詭詐會昌中其國實遇天災莫能地著盡皆
散徙遂至滅亡朕自纂承丕圖常多軫惻爰命使者將遠
撫之訊厥存亡俾求嗣立輶車甫至於靈武蕃使已及於
塞垣迨至闕庭深陳血懇稱可汗已立諸部賓歸實資神

金史卷之三十一 十一
二
祇之衛乃藉忠勲之力果能克紹叶纂舊圖頗協人願深
契朕志尚恐未爲諸蕃所信猶疑新造之邦是用特命使
臣遵行冊禮於戲布德茂功柔遠祇邇前代之所以稱禮
也使若敖氏之無後何以勸善須布中外咸使聞知表朕
中懷不問夷夏可冊爲盟祿登里邏汨沒密施合俱錄毗
伽懷建可汗命檢校祕書監兼御史中丞王端章持節冊
使仍令所司擇日備禮冊命

答諫迎道士軒轅集詔

朕以萬機事繁躬親庶務訪聞羅浮山處士軒轅集善能

攝生延齡益壽乃遣使迎之或冀有少保理也朕每觀前史見秦皇漢武爲方士所惑常以之爲誡卿等位當論列職在諫司閱視來章深納誠意

答河東軍民乞留節度使崔彥昭詔

彥昭早著令名累更劇任入司邦計開張用經緯之文出統藩維撫馭得韜鈴之術自臨并部殷若長城但先和衆安人不欲恃險與馬遂致三軍百姓瀝懇同詞備述政能惟恐罷去顧茲重鎮方委長材旣獲便安未議移替想當知悉

遺詔

生死之理修短之期古往今來是其常也爰以宗祧所繫
嗣續有歸眷彼臣寮宜申顧託我先朝憲宗昭文彰武大
聖孝皇帝承十聖之基構翼翼爲心平五道之寇讎孜孜
不怠雖長慶促運寶歷生奸文宗揚其耿光武宗付朕鴻
業自臨億兆十有四年每思偃武修文庶幾至德要道賴
諸良弼罄乎嘉猷或陳無逸之篇或進勿休之說東后畢
覲西旅繼來克復河湟拓疆三千里外告成宗廟雪恥二
百年間僅稱太平咸曰丕變顧朕寡昧何以堪之今也天

命靡常冥數先定與我之齡雖盡卜世之年甚長趣彼若
遇歸之命而非夭釋然何慮胎厥孫而有謀皇太子淮羽
翼早成春秋已盛旣膺主鬯克荷承祧宜於柩前即位仍
以門下侍郎平章事令狐絢攝冢宰軍國務殷豈可久曠
以日易月宜遵舊制皇帝三日而聽政二十七日而釋服
天下節度觀察防禦等使及監軍諸州刺史職守非輕並
不得離任赴哀天下人吏百姓告哀後出臨三日皆釋服
無禁婚嫁祠祀飲酒食肉釋服之後無禁舉樂文武官等
朝晡臨事皆十五舉音宮中當臨者非時無得擅哭前漢

金史卷之二十一
與後魏孝文俱從薄葬朕甚慕之營奉山陵稍減常制勿
以金銀錦綵緣飾葬具醫術之徒夙夜勞苦深可矜念不
須理問五坊鷹犬並令解放咨爾內外將相爪牙腹心之
臣其敬保我令子輯寧我邦家成朕素懷克底於道布告
遐邇咸使聞知

欽定全唐文卷八十一目錄

新文藝出版社藏書

宣宗 三

給夏州等四道節度以下官俸勅

寬私酤禁勅

命南郊前速議庶獄勅

復廢寺勅

權停聽政勅

答屯田奏交替職田合計閏月勅

科吳湘獄勅

禁加徵熟田勅

權停聽政勅

答崔珙奏勅

獲賊支給賞錢勅

許罪人歸葬勅

允宰臣請御丹鳳樓上尊號勅

定州縣官請假勅

定諸縣主壻官秩勅

公主縣主有子女者不得再降勅

簡勘官健等勅

禁公主家邑司擅行文牒勅

刺史交代勅

停稅茶勅

答考功條陳勅

禁鵝耳稱冤勅

禁嶺南貨賣男女勅

遣宋涯宣慰安南邕管勅

重建總持寺勅

立鄆王爲皇太子勾當軍國勅

平党項德音

洗雪南山平夏德音

洗滌長慶亂臣支黨德音

賑恤江淮百姓德音

欽定全唐文卷八十一

宣宗三

給夏州等四道節度以下官俸勅

夏州等四道土無絲蠶地絕征賦自節度使以下俸料賞設皆剋官健衣糧所以兵占虛名軍無戰士緩急寇至無以支敵將欲責課又皆有詞須有商量用革前弊夏州靈武振武節度使宜每月各給料錢廚錢共三百貫文監軍每月一百五十貫文別勅判官每月五十貫文節度副使每月七十貫文判官掌書記觀察判官每月各五十貫文

推官四十貫文賞設每道每年給五千貫文修器械每道給二千貫文天德軍使料錢廚錢每月共給二百貫文監軍每月二百貫文都防禦副使每月五十貫文判官每月四十貫文巡官每月三十貫文賞設每年給三千貫文修器仗每年一千貫文如以後依前兵額不實器仗不修其本判官重加貶降主帥別舉處分其所給料錢等並以戶部錢物充起十月支給一年以後仍每秋一度差御史一人點簡兵士器仗聞奏

寬私酤禁勅

揚州等八道州府置榷麴并置官店酤酒代百姓納榷酒錢并充資助軍用各有權許限揚州陳許汴州襄州河東五處榷麴浙西浙東鄂岳三處置官店酤酒如聞禁止私酤過於嚴酷一人違犯連累數家閭里之間不免咨怨宜從今以後如果有人私酤酒及置私麴者但許罪止一身并所由容縱任據罪處分鄉井之內如不知情並不得追擾其所犯之人任用重典兼不得沒入家產

命南郊前速議庶獄勅

聖人嚴配圓丘將以孝理天下而歷代因之務行大赦寬

滯者可從昭洗險慝者宜示澄清所有大禮前據有罪已結者亦在速令詳議無至惠姦

復廢寺勅

會昌季年併省寺宇雖云異方之教無損致理之源中國之人久行其道釐革過當事體未宏其靈山勝境天下州府應會昌五年四月所廢寺宇有宿舊名僧復能修創一任住持所司不得禁止

權停聽政勅

門下朕聞恭順之道人倫大經省奉之儀臣節攸重況發

自誠悃稽諸典謨庶叶禮文式遵前憲伏以積慶殿皇太后坤元降秀皇極居尊道冠母臨訓彰壺職屬時當濡露感切於孝思氣爽保和恙生於寒暑自春歷夏有加無瘳焦思匪遑旦夕增灼豈尚安於聽斷且欲專於候問恐中外具僚未諒予意起今月十四日以後權不聽政故茲宣示宜體朕懷

答屯田奏交替職田合計閏月勅

五歲再閏固在不刊二稔職田須有定制自此已後宜依屯田所奏永爲常式

科吳湘獄勅

李回鄭亞元壽魏劔已從別勅處分李紳起此冤訴本由不真今既身歿無以加刑粗塞衆情量行削奪宜追奪三任官告送刑部注毀其子孫稽於經義罰不及嗣並釋放李德裕先朝委以重權不務絕其黨庇致使冤苦直到於今職爾之由能無恨歎昨以李威所訴已經遠貶俯全事體特爲從寬宜準去年勅令處分張宏思李公佐卑吏守官制不由己不能守正曲附權臣各削兩任官崔元藻曾受無辜之貶合從洗雪之條委中書門下商量處分李恪

詳驗款狀蠹害最深以其多時須議減等委京兆府決脊杖十五配流天德李克勲欲收阿顏決脊杖二十配流破州劉羣據其款狀合議痛刑曾効職官不欲決脊決臀杖五十配流岳州其盧行立及諸典吏委三司使量罪科放訖聞奏

禁加徵熟田勅

朕以俗未臻於富庶念每切於黎元衣食罕充旰昃興歎夫百姓田疇地有高低歲有善惡偶有水澇即低田不稔稍遇亢旱即高處無苗近聞州縣長吏掩其水旱傷損務

求辦集唯於熟苗上加徵將填欠數致使黎元重困惠養
全乖自今後州縣百姓有遭水旱苗稼不收處簡驗不虛
便準前後勅文破免不得加徵熟田人戶令本配額外重
出斛斗

權停聽政勅

朕聞禮發乎因心服勤於遺體周典著問安之範戴經存
就養之文垂爲格言式示達禮惟朕小子敢廢前修伏以
太皇太后母臨六宮子育羣品清淨養性恬和保神屬時
暑小侵違豫不閒寢膳未復憂灼靡寧日欲親於藥餌情

豈安於聽斷凡有事務且委司存恐中外具僚未悉予意起今月二十日以後權不聽政故茲宣示宜體朕懷

答崔珙奏勅

省所奏當府周公祠舊有泉水枯竭十月中因風泉水五處一時湧出又有七處見出并圖畫進上事具悉朕聞致理之代地出醴泉蓋以澤可濟時德推上善徵諸傳記最爲休祥朕以虛庸敢膺元貺披圖見瑞省表增慙豈惟菲德致之亦卿循良所感臨軒嘉歎至於再三今賜名潤德泉想宜知悉冬寒卿比平安好遣書指不多及

獲賊支給賞錢勅

兩軍及諸軍巡捉得劫賊京兆府先勝懸賞近日捉獲得賊都不給付既違公勸何以勵人宜令京兆府所有軍巡捉獲劫賊便須支給賞錢

許罪人歸葬勅

先經流貶罪人不幸歿於貶所有情非惡逆任經刑部陳牒許令歸葬絕遠之處仍量事官給棺槨

允宰臣請御丹鳳樓上尊號勅

沒陷河湟百有餘歲中原封界咫尺戎疆累聖含容久勞

征戍伏思元和中將據宿憤常欲經營屬誅鋤叛臣未暇收復今則恭行先志克就前功不遠徵兵不勞財力二州之外兼得七關又取維州粗成邊業尚以息人解甲未收山外諸州且以肆眚申恩所以頒示天下其御樓依所乞

定州縣官請假勅

設官分局各有主張其於在公責辦斯切諸州府及縣官到任已後多請遠假或稱周親疾病或言將赴婚姻令式既有假名長吏難爲止遏遂使本曹公事併委北廳手力俸錢盡爲已有勤勞責罰則在他人須有條流俾其兼濟

其諸州府縣官如請公廨假故一月已下即任權差諸廳判官一月已上即準勾留例其課料等據數每剋二百文與見判案官添給

定諸縣主壻官秩勅

諸縣主壻選尚之初多無官緒或正員初秩授檢校朝官從前條流都未詳備自今以後縣主壻如先有官宜超資與進改如未有官者且授檢校官待三周年後與第二任正員官仍委宗正卿檢勘聞奏

公主縣主有子女者不得再降勅

夫婦之際教化之端人倫所先王猷爲大況枝連帝戚事繫國風苟失常儀卽紊彝典其有節義乖常須資立制如或情有可愍卽務從權俾協通規必惟中道起自今以後先降嫁公主縣主如有兒女者並不得再請從人如無兒女者卽任陳奏宜委宗正寺準此處分如有兒女妄稱無有輒請再從人者仍委所司察獲奏聞別議處分並宣付命婦院永爲常式

簡勘官健等勅

如聞諸道軍將及官健等近日所在將帥多務因循當召

募之時已不選擇及收補之後曾莫教招遂使名在戎行少能知其弓矢職居列校罕見識於韜鈴緩急忽有徵差便取見在應數惟憂就役豈暇圖功虛費資糧莫克讎敵爲弊頗久須有舉明自今已後委諸道觀察節度都防禦團練經略等使每道慎擇會兵法及能弓馬解槍弩及筒射等軍將兩人充教練使每年至合教習時分番各以本藝閱試其間或有技藝超異者量加優賞仍作等第節級與進改職名每至年終都具所教習馬步及各執所藝人數申兵部及中書門下仍委兵部簡勘都開件聞奏所冀

各盡伎能自成勁銳其支郡有兵處亦委本道點簡訓練
準詔處分

禁公主家邑司擅行文牒勅

應公主家有莊宅邸店宜依百姓例差役征課如邑司擅
行文牒隱庇兼藏匿要人便委諸軍諸使及府縣當時捕
捉收禁聞奏其邑司官吏及印本緣徵封須行文牒今即
便因他事攬撓府縣自今以後除徵封外如緣公事並令
邑司申宗正寺寺司與酌量公事行牒其邑司並不得擅
行文牒

刺史交代勅

條疏刺史交代須一一交割公事與知州官方得離任準
會昌元年勅刺史只禁科率由抑配人戶至於使州公廨
及雜利潤天下州府皆有規制不敢違越緣未有明勅處
分多被無良之吏致使恐嚇或致言訟起今後應刺史下
擔什物及除替後資送錢物但不率斂官吏不科配百姓
一任各守州縣舊例色目支給如無公廨不在資送之限
若輒有率配以入己贓論

停稅茶勅

裴休條疏茶法事極精詳制置之初理須畫一並宜準今年正月勅處分

答考功條陳勅

考功所條流較考功事頗爲詳悉唯一件難便允從近日俗尚矜能人少廉恥若榜門許其論告則自此必長紛爭當否之間固有公議其一件宜落下餘依奏

禁榜耳稱冤勅

勅準開元十三年八月十四日及太和八年二月十三日勅文榜耳稱冤先決四十然後依法勘當近日無良之徒

金史卷之二十一
等閒詣闕勞耳每驚物聽皆謂抱冤及令推窮多是虛妄
若不止絕轉恣凶狂宜自今以後應有人欲論訴事自審
看必有道理即任自詣闕及經臺府披訴當爲盡理推勘
不令受冤更不得輒有自卧階前勞耳有犯者便準前勅
處分後配流遠處縱有道理亦不爲申明

禁嶺南貨賣男女勅

朕自臨御以來常恐一物失所以傷陰陽之和致災厲之
變而重困吾民故推教化之源務率先之道減服御絕玩
好苟利於民者無不行阻撓於政者無不改而郡縣災疫

相繼屢奏流亡慘怛之懷疚於寤寐將何以臻於富庶哉
苟害生民豈憚釐革如聞嶺外諸州居人與夷獠同俗火
耕水耨晝乏暮飢迫於征稅則貨賣男女姦人乘之倍討
其利以齒之幼壯定估之高下窘急求售號哭踰時爲吏
者謂南方之俗夙習爲常適然不怪因亦自利遂使居人
男女與犀象雜物俱爲貨財放闕四方鰥寡高年無以養
活豈理之所安法之所許乎縱有令式廢而不舉爲長吏
者何以副吾志自今已後無問公私土客一切禁斷勅諸
州刺史各於界內設法鈐制不得容姦依前販市如敢更

有假託事由以販賣爲業或虜劫谿洞或典買平民潛出
券書暗過州縣所在搜獲據贓狀依強盜論縱逢恩赦不
在原宥之限仍仰所在切加把捉如違節級科斷其方鎮
及監軍使命並州府寮吏等自當謹守詔條率身奉法倘
有踰犯當重科繩其白身除準勅常數進送外亦準此處
分其百姓兩稅定額各據土地所出方圓收納不得豎色
目妄配亂徵致令艱愁莫相保守如有貧窮不能存濟者
欲以男女傭雇與人貴分口食任其行止當立年限爲約
不得將出外界還同交關各委本道長吏專加糾察仍先

具條流聞奏其餘州縣更有積弊深害百姓而因循未革者亦具分析聞奏當酌量處分粗安黎庶稱朕意焉

遣宋涯宣慰安南邕管勅

四海九州莫非吾之赤子念茲遠俗尤用軫懷如聞日南自郭細爲亂之後溪洞頻有不安朗寧去歲已來屢爲南蠻侵軼遠思裔俗載想疲黎有枉莫伸無辜受戮者多矣想思朝廷之弔問若大旱之望膏澤也是用申詔執事聿求使臣內外通班文武多士爰擇敏達副吾選求銀青光祿大夫檢校太子賓客兼右千牛衛大將軍侍御史上柱

國宋涯早列和門夙通軍志公忠有素文武是經信義彰
美於禁營政績茂宣於汧隴吾所求者爾其人乎昔司馬
相如奉漢廷之命通西南夷路飛檄曉諭不勞師征夜郎
牂牁等皆生梗之俗猶能永奉漢法於今稱之而況安南
邕管皆吾藩方雖遠朝廷咸遵法理爾其將我憫憐之意
深訪疾苦之源貧者撫之富者利之老者安之少者懷之
盡爾公廉究茲利病因宜制變臨事合權能安遠方克致
寧謐豈無崇秩以獎勤勞俾增石室之榮以盛輶車之貴
無憚遐役佇立厥功可守本官兼御史中丞充安南邕管

等道宣慰使

重建總持寺勅

朕以政閑賞景幸於莊嚴其寺複殿重廊連甍比棟幽房
秘宇窈窕䟽通密竹翠松垂陰擢秀行而迷道闕天下梵
宮高明寡匹當建之時以京城西昆明池勢微下乃建木
浮圖高三百尺藩邸之時遊此伽藍覩斯勝事其總持寺
大業中立規制與莊嚴寺正同今容像則毀忍草隨荒香
徑蕪侵尚存基址其寺宜許重建以副予心

立鄆王爲皇太子勾當軍國勅

朕以寡昧獲承丕構潔誠以奉九廟恭己以臨兆人宵旰
在懷罔敢暇逸而憂勞所迫蒸暑或加疾恙未瘳旣逾旬
朔萬幾繁重不能躬親詢於大臣稽以古訓永惟負荷之
重思建儲貳之賢用舉徽章式固大本長子鄆王溫宜改
名漼濬哲天縱孝敬日躋秉德不回出言可法英姿齊聖
粹厚而恭道叶繼明義符立長可以貳於神器增輝前星
宜立爲皇太子權勾當軍國政事咨爾三事百辟內外臣
僚宜協乃心敬輔元子罔違於道俾致時雍布告遐邇咸
令知悉

平党項德音

門下冒法干紀豈限於華夷伐罪弔人固資於典訓朕端拱御寓六年於茲兢兢業業不敢荒怠常恐一物失所羣心靡寧旰食宵衣思底於道屬者以党羌恣爲侵叛尤苦農商朕爲人父母豈無憫惻雖傷財害物非朕躬之願而禁暴定功實武經之要是以爰興師旅龔行天討而凶渠稔惡稽曠歲時師宿旣勤物力將屈賴宗社儲祉中外叶心大搜妖巢盪定關隴誠殫財而凋力亦暫費而永寧今則軍功已成制置將就息戈解甲固在及時捨罪緩刑所

宜布澤南山党項爲惡多年化諭不悛頗爲邊患近興兵士經歲討除拒官軍者悉就誅擒懼法令者皆從逃竄大開湯網已施去殺之仁遠並堯年寧限可封之屋今聞殘寇無所依歸皆是王人豈忘憫惻其南山党項已出山者或聞逼於饑乏猶行劫奪平夏不容無處居住今委李福且先遣蕃官安存招誘令就夏銀界內指一空閑田地居住所有從前掛涉惡跡者今一切不問惟再犯疆界却入山林或不從指揮即召募平夏党項精銳者討逐議不容捨如能革心向化願同平夏即須投誠獻款跡效分明撫

馭之閒便同赤子如有屈事即任於本鎮投狀論理仍各令本鎮遣了事軍將安存平夏党項素聞爲善自旬月以來發使撫安尤見忠順一如指揮便不猖狂各守生業自茲必令永戴恩信長被華風或聞從前帥臣多懷貪剋部落好馬悉被誅求無故殺傷致令怨恨從今已後必當精選清廉將帥撫馭羌戎明下詔條漸令知悉靈鹽夏州邠寧鄜坊四道官吏自用兵以來責辦公事亦甚辛勤軍將皆已得官文吏未酬勞績宜令每道揀選公勤有勞效官吏具名聞奏有官者與依資轉遷無官差攝者當與正官

仍具差攝年月申奏直須公當不得轉授囑託如是將帥
親情亦須具言四道百姓徵斂不時差役至多疲瘵亦甚
或聞屋宇被賊焚燒至於桑麻亦遭砍伐生業既失須加
安存宜各優給三年其有無屋可居無牛可種者委長吏
量事接借一一奏聞仍須早設法招攜令各歸復勿令豪
富便占產業爲生自用兵以來諸道應徵發之處所有將
健或沒於鋒刃或存被瘡痍雖經褒贈及曾優恤委本道
更加存撫或自因廢疾不任在公者終身不停衣糧如情
愿回與子孫兄弟甥姪者便與補替應討伐党項諸道在

行營將士已頒賞賜邊上制置有敘績節級放還仍委本道敘錄具名聞奏當加甄獎自用兵已來京師與鄜坊邠寧兩道接界及當路諸縣差役繁併物力凋殘若無優矜必難存立其今年夏稅錢及青苗錢每貫量放三百文其斛斗糧量放一半仍委京兆尹差官子細磨勘其或雖在鄉村不曾經供應者不在準例放限仍一一條件等第聞奏如是分路處就中更校便併者量加優恤必使均平其所放錢及斛斗委戶部以實錢支填仍令京兆府各下諸縣散榜鄉村要路曉示百姓務令知悉用兵以來城鎮曾

遭陷沒官健百姓因被殺傷親戚既無遺骸在野委所在
長吏差人爲收拾如法埋瘞仍量事致祭應有增修城鎮
添置堡候委所在將帥擇其要害絕彼窺覷切務堅完令
可固守邊上不許以兵器於部落博易從前累有制勅約
勒非不丁寧近年因循却不遵守自今已後委所在關津
鎮鋪切加捉搦不得輒有透漏其有犯者推勘得實所在
便處極法其所經過州縣關津鎮鋪節級痛加懲責義無
容貸其間或情涉隱欺準所犯人處分黨項本是邊畔只
合州縣撫馭致令一朝侵叛由於處理乖方既往不可加

刑從今必行法令自此之後邊上逐界皆已有制置把捉如或更有羌寇侵盜即是將帥依前貪求當先加罪於本界邊將然後翦逐寇賊通商之法自古明規但使處處流行自然不煩饋運委邊鎮宜切招引商旅盡使如歸除禁斷兵器外任以他物於部落往來博易應緣徵兵處士馬皆效勤勞亦已各有賞賜其本道將帥當續議量加酬獎京畿及鄜坊靈鹽邠寧夏州并涇州鳳翔振武天德等道自用兵以來人頗勞苦今頒德澤須令曲恩應見禁囚徒據罪遞減一等惟官典枉法犯賊及賊中有持杖劫人故

殺人等不在此限如有積年逋賦必加徵督不得者委長
吏條流聞奏準格律大功已上親及女婿外甥不許連任
自用兵已來諸道節將及長吏權宜差親表主持公事兵
罷之後理當不然其三族內親並不得令主兵權及充要
職如是元在本軍先充職掌者亦須具名聞奏自用兵以
來科配百姓事取濟辦多出權宜今既罷兵諸道節度防
禦刺史及鎮使等不得更依前妄有科配仍令各具本管
侵害百姓事須釐革者作條件聞奏自党項擾亂以來所
在多被攻劫白刃之下必有孝子順孫義夫節婦事跡有

可稱者委所在長吏察訪優恤其家仍具名聞奏將加旌異於戲蠻夷猾夏固有用於常刑撫馭乖方遂致興於薄伐傷夷暴露朕實愧焉是用覃恩以慰勞瘁布告中外咸使聞知主者施行

洗雪南山平夏德音

平夏南山雖云有異源流風俗本實不殊我國家累聖以來許居內地久奉聲教亦立功勞朝廷撫綏常布恩信近者邊陲之帥制御乖方遂有凶悍之徒不率父兄之教或侵暴州鎮或攻掠道途告諭罔悛猖狂頗甚朕君臨區寓

深念黎元凡曰含生皆同赤子但欲爲人除害固非黷武
佳兵每覩殺傷深多憫惻是以去年洗雪平夏驅除南山
及聞窮困無歸復有懷來之意遂令白敏中李安業分統
諸軍先示招攜仍加訓練但知非則赦免不得已則誅鋤
王者之師義實在此近得敏中狀申南山盡願歸降瀝懇
輸誠惟思展效請般運糧料乞保護封疆閱其奏章深愜
朕意比者或有剽劫必推南山南山或有寇擾亦指平夏
旣相非斥互說短長終難辨明祇益仇怨今則並從洗雪
咸許自新但能各務安全遞相勸勉保其生業絕彼侵踰

從前所有愆違自此一切不問惟鹽州深居沙塞土乏農桑軍士運糧須通商旅沿路堡柵事須修營今委李安業依朝廷制置差兵建築防守尤恐部落心懷疑慮委令李安業駐軍塞門朕之屈法從人斯爲極矣若執迷不返干犯國章後悔難追深宜自省

洗滌長慶亂臣支黨德音

門下皇王之令凶逆必寘於嚴誅天地之仁含育亦存乎在宥除惡務絕其根本原情必諒於親踈慮興誑誤之嫌用安反側時舉寬宏之典盡滌瑕痕追維長慶之初亂臣

賊子之輩人神共憤覆燾不容頃以論刑是從流竄而東
宮親昵之黨亦參帷幄之謀顧偷冒以取恩陷君父於不
義必資懲創以盪奸源議法當然非朕敢赦而曾不知過
交構流言興謗道途扇惑人聽蓋以從前搜捕未盡巢穴
猶存再令根尋果獲支黨無非近戚咸伏其辜在臣節而
既虧於國章而難逭并已從別勅處分除竄逐遐荒及配
諸陵守當外應諸惡黨從祖兄弟子壻妻族內外親戚門
生故吏及比來別居并從踈遠等降德音後一切不問諸
司諸使更不用尋勘務從寬恕俾絕憂疑惟先推鞠得姓

名合流者雖已逃竄如獲日準前勅處分頃者屢降明詔以順人心重此究尋蓋非獲已今則更無餘孽永絕猜嫌攄憤之志既申懲惡之刑亦至乘春布澤大與惟新明示中外咸知予意主者施行

賑恤江淮百姓德音

門下朕以寡昧嗣守睿圖奉列聖之不訓撫寧四海受一作膺上天之景命司牧兆人敢忘勵志勤身虔恭寅畏雖動思罪己而陰陽屢愆每念惠人而蒸黎尚困是由政教無素王澤不流精誠未達於穹蒼災沴遂痛於下土是用中

宵輟寐未明求衣言念及此良深愧惕近者江淮數道因之以水旱加之以疾癘流亡轉徙十室九空爲人父母寧不震悼此乃天之垂誠咎實在予焚灼於懷夙夜增懼當宁興嘆遂命使臣乘驛撫巡便宜救恤減上供饋運發諸道倉儲免積歲之逋租蠲逐年之常貢尚思災疫之後閭里未安須更申明用示優軫應揚潤廬壽滁和宣楚濠泗光宿等州其閒或貞元以來舊欠逃移後闕額錢物均攤見在人戶頻年災荒無可徵納宜特放三年待稍完復却即令依舊或逋懸錢物斛斗數內先已放免度支却徵收

者宜委本司細詳元勅磨勘如合放免不得追徵或先因水旱賑貸欠常平義倉斛斗若終不可徵收亦宜放免或今年合徵兩稅錢物量百姓疾疫處各委逐州準分數於上供留州留使三色錢內均攤放免或收管諸色逋懸錢物等年月深遠但挂簿書空務追徵益生勞擾宜委有司速勘會了絕蠲放不得留爲應在以資奸蠹之徒其濠泗宿三州大中六年以前所在逋懸宜亦放免或以常平義倉斛斗賑恤者宜委本司收破其賑貸者即待秋熟填納所減上供運米及州縣諸色斛斗等已令減價糶貸救接

百姓用止翔貴以濟周貧或每年進奉茜草藥物紵練貢布等亦已條流節級停減以前諸色應蠲免節目等或已行勅令或見勒條流並委中書門下各令本州及本司速準此處分仍具各分析聞奏所有諸道放免事例宜委州縣於鄉村要路一一榜示遍令閭閻分明知悉又以數道疾疫百姓流亡永言宵旰之勤豈務珍華之貢其淮南宣歙浙西三道今年賀冬及來年賀正所進奉金銀錢帛宜特放免均融仍各委本道觀察使據所放均融貸貧下戶填納稅租其逃亡戶如賑恤使有所不該者亦以此便宜

濟助務令蘇息又江淮數州水旱相繼安南一境寇擾初
寧公用之間必當虛竭但緣及時錫賚須遣使臣其淮南
宣潤安南等四道今年冬衣使本道合與常例人事物等
亦宜權停於戲天災流行自古未免屬在牧宰爲吾撫安
豈無惠育之方以濟凋殘之弊如或守法不謹吏緣爲奸
紀律乖訛刑法踰濫重繫者因循不省逮捕者追擾滋多
或征賦不均或徵科無算有一於此重困吾人即何以消
弭災譴用康疲瘵宜委所在長吏慎恤刑獄踈決囚徒必
務躬親俾無冤滯檢轄暴吏懲殿慢官寬常賦之征罷不

急之務詳求病利悉以奏陳恭佇良規用副憂寄苟不遵
詔旨尚務侵欺必正刑書義無容貸宣示中外宜諒予懷
主者施行